

Léiw Matbierger aus de Gemenge Groussbus a Wal,

Mir hunn eis an deene verschiddene Workshoppe vill Gedanke gemaach, wat da lo schlussendlech eng Fusioun dem Bierger dobausse brénge kann. Well doréms geet et jo am Endeffekt; et ass jo definitiv nitt Ziel vun deenen aktuellen zwee Gemengeréit sech hei wëllen een Denkmal ze setze mat dësem dach iergendwéi historesche Schrëtt fir di zwou Gemengen.

Ganz am Géigendeel, op mëttel a laang Sicht schafe mir eis als Politiker zumindest zum Deel of; Wann d'Fusioun zu stane komme soll, da sinn am nächste Gemengerot paritéitesch 6 Waler Verrieder a 6 Groussbusser Verrieder am gemeinsame Gemengerot. Deemno geet d'Zuel vun de Groussbusser Verrieder vun aktuell 9 op 6 erof; dat selwecht gëllt fir Wal, wou bei deenen nächste Walen och 9 Gemengeverrieder ze wies gewiescht wieren; bei enger méiglecher Fusioun geet déi Zuel dann och erof op 6.

Dir gesitt léif Leit, géif et eis Politiker drëm goe coûte que coûte un eise Poste pechen ze bleiwen oder eis eegen Interessen an de Virdergrond ze stellen, da wiere mer mat dëse Fusionspläng ganz schlecht beroden. Deem ass awer Gottseidank nitt esou, ëmsou interessanter ass den Ëmstand, dat bei deenen aktuelle Gemengeréit Leit dobäi sinn, déi déi éischte Kéier an e Gemengerot gewielt goufen an déi trotzdeem mat hire Kollegeen, déi scho méi laang dobäi sinn, e breede Konsens bei de Fusiounsgesprécher fonnt hunn.

Zréck zu eiser eigentlecher Fro: **Wat bréngt dem Waler an dem Groussbusser Bierger eng Fusioun vun hiren zwou Gemengen?**

Ofgesi vun der Tatsaach, datt mer mat dëser Fusioun zur **véiert gréisster Gemeng am Kanton** Réiden ginn, an domadder och **politesch méi Matsproocherecht** an de kantonale Gremie kréien, wat nëmmen zum **Wuel vun eiser Populatioun** ka sinn, sou wäert an eisen Aan dës Fusioun och um Terrain selwer ganz konkret fir jidderee vun eis ze spiere sinn.

Mir denken, dat d'Zesummeleë vun eisen zwou Verwaltungen an eisen zwee techneschen Déngschter nitt direkt zu Aspuerunge beim Personal féiert, mee dat mer eis **Zerwisser vill besser opgestallt an organiséiert** kréien. Op eis Gemengen an op hiert Personal sinn an de leschte Joren ëmmer méi Aufgabe vu Säite vum Staat operluecht ginn; wat fir grouss Gemenge mat ville Salariéë méi liicht ze stemmen ass ewéi fir kléng Landgemenge à la Groussbus oder Wal.

D'Erwaardungshaltung beim Bierger ass och an de leschte Jore gewuess an dat zu Recht: et kann a soll dem Bierger egal sinn, ob en zu Réimech, an der Staat, zu Kéiber oder zu Dellen wunnt; all Bierger huet, egal wou hi wunnt, Recht op di selwecht Zerwisser, Recht op di selwecht **schoulesch, sportlech oder kulturell Infrastrukturen**. Eis zwou Gemengen hunn numol awer manner finanziell Mëttel ewéi gréisser Gemengen am Zentrum oder am Süde mat groussen Industriezonen, an duerfir schéngt et eis ëmsou méi wichteg eis Stärkten an och eis Schwächen zesummen ze leeën, fir dorausser **gemeinsam méi performant** ze ginn.

Et kann am Joer 2021 nitt méi sinn, dat de Bierger virun enger zouener Gemengendier steet oder säin Uleies nitt ka virbréngen, well den zoustännege Beamten am Congé ass oder krank gemellt ass. Mam Zesummeleë vun deenen zwou Verwaltungen wäert et méiglech ginn e Backup fir all Funktioun ze schafen, fir dat ebe grad dës onglécklech Situatioun sech nitt méi stellen.

Besonnenesch awer beim techneschen Déngscht, stelle mir eis vir, dat de Schäfferot d'Aarbechter op verschidden Zerwisser jee no Qualifikatioun kann opdeelen, déi sech dann an hirer Aarbicht kënne spezialiséieren a virubilden. Als bescht Beispill sief Drénkwaasser-versuergung genannt, wou de Gemengen eng Schlësselroll zoukéint als Liwwerant vun engem primäre Liewensmëttel; een aneren Zerwiss kéint sech exklusiv em d'Gemengeweeër këmmen; e Service Jardinage em d'Grünanlagen asw.

Eis Gemenge fonctionéieren (nach) fir de Moment ganz gutt an et soll och kengesfalls hei den Androck opkommen, mer wéilten di aktuell Funktionsweis kritiséieren.

Et geet vill méi drëm eis administrativ an technesch Zerwesser **méi effizient fir d'Zukunft opzestellen** an domadder engersäits dem Personal d'Aarbecht z'erlichteren, an anerersäits dem Bierger nach eng besser Déngschtleeschtung unzebidden, ewéi hien se elo scho virfënnt.



Roger Gereke
Conseiller Groussbus



Maggy Glesener-Haas
Conseillère Groussbus



Jean-Paul Neiertz
Conseiller Wal